




МЕМЛЕКЕТ БАСШЫСЫ БОЛГАРИЯ ПРЕЗИДЕНТІН АЗАТ ЕТУ КҮНІМЕН ҚҰТТЫҚТАДЫ



Қасым-Жомарт Тоқаев Болгария Республикасының Президенті Румен Радевке осы елдің ұлттық мерекесіне орай құттықтау жеделхатын жолдады.

Қазақстан Президенті құттықтауында екі ел арасындағы дәстүрлі достық пен өзара тиімді ынтымақтастыққа негізделген қарым-қатынастың одан әрі нығая беретініне сенім білдірген.

Қасым-Жомарт Тоқаев Румен Радевтің жауапты мемлекеттік қызметіне толағай табыс, ал достас болгар халқына құт-береке тіледі.

ҚҰТТЫҚТАУ ЖЕДЕЛХАТЫ



Президент Қасым-Жомарт Тоқаевтың атына шет мемлекеттердің басшылары мен халықаралық ұйым жетекшілерінен қасиетті Рамазан айының басталуына орай құттықтау жеделхаттары келді.

Мемлекет басшысын Өзбекстан Президенті Шавкат Мирзиёев, Сауд Арабиясының Королі, Қос киенің сақшысы Салман бен Әбделазиз Әл Сауд, Сауд Арабиясының Тақ мұрагері, Премьер-министрі ханзада Мұхаммед бен Салман бен Әбделазиз Әл Сауд, БАӘ Президенті Мұхаммед бен Заид Әл Нахаян, БАӘ Вице-президенті, Премьер-министрі, Дубай билеушісі Мұхаммед бен Рашид Әл Мактум, Иордания Королі II Абдалла бен әл-Хусейн, Кувейт Мемлекетінің Әмірі Мишааль әл-Ахмад әл-Джабер ас-Сабах, Кувейттің Тақ мұрагері Сабах Халид әл-Хамад ас-Сабах, Оман Сұлтаны Хайсам бен Тарик, Мысыр Президенті Әбдел Фаттах ас-Сиси, Марокко Королі VI Мұхаммед, Бахрейн Королі Хамад бен Иса Әл Халифа, Израиль Президенті Ицхак Герцог, Ислам ынтымақтастығы ұйымының бас хатшысы Хиссейн Брахим Таха, ОПЕК бас хатшысы Хайсам әл-Гаис және басқалары құттықтады.

Қазақстан Президентінің атына құттықтау жеделхаттары әлі де келіп түсіп жатыр.

ТҮРКІСТАНҒА ЕРЕКШЕ МӘРТЕБЕ БЕРІЛДІ

Мемлекет басшысы «Түркістан қаласының ерекше мәртебесі туралы» Қазақстан Республикасының заңына қол қойды.



Занда еліміздің рухани, тарихи-мәдени, туристік орталығы және сәулет мұрасы ретіндегі Түркістан қаласының ерекше мәртебесі бекітілген.

Құжат қаланың тарихи-мәдени ескерткіштері мен нысандарын басқарудың, сақтаудың және тұтастығын қамтамасыз етудің тиімді жүйесін құруға негізделген.

«Қожа Ахмет Ясауи кесенесінің бірегейлігін сақтап қалу үшін Түркістан қаласының аумағында тарихи нысандарға айтарлықтай қауіп төндіруі мүмкін жұмыстарды жүргізуге тыйым салынады. Сонымен қатар кесенені қорғау аймағында биіктігі 7 метрден асатын

және оның шекарасынан 100 метр қашықтықта ауқымы, түсі мен құрылыс материалдары бойынша ескерткіштермен үйлеспейтін нысандар салуға рұқсат етілмейді. Шаһар аумағында археологиялық ескерткіштердің резерваты құрылады,» – деп көрсетілген жаңа заңда.

Осылайша, қалада жайлы орта құру, соның ішінде мүгедектігі бар адамдарға инфрақұрылымдарды қолжетімді ету және инклюзивті туризмді дамыту маңызды бағытқа айналады. Бұл жергілікті тұрғындар мен туристер үшін қаланы қолайлы әрі тартымды етуге мүмкіндік береді.

КӨЛЕҢКЕЛІ БИЗНЕС КӨСЕГЕНІ КӨГЕРТПЕЙДІ

Президент 2024 жылғы 2 қыркүйектегі соңғы Жолдауында жаңа Салық кодексі жобасына тоқтала келе, көлеңкелі экономика үлесінің жоғары болуы қаржы саласындағы ахуалды ушықтырып тұрғанын ашық айтты. Оны айтарлықтай төмендету үшін мұқият ойластырылған, жан-жақты, нақты шара қабылдауды тапсырды. Осы орайда Экономика министрлігі ҚҚС шегін төмендету арқылы орта бизнесті көлеңкеден шығаратынын мәлімдеді. Алайда Премьер ҚҚС-тің көлеңкелі экономикаға тікелей қатысы жоқтығын айтып отыр. Мәселенің мәнісіне бойлап көрелік.

КӨЛЕҢКЕДЕН КҮНГЕЙГЕ «ТЫҚСЫРЫП ШЫҒАРАДЫ»

Ұлттық экономика бірінші вице-министрі Азамат Әмрин журналистермен кездесу кезінде шағын және орта бизнесті көлеңкеден шығару үшін қосылған күн салығының (ККС) ең төменгі межесін азайтудың маңыздылығына тоқталды. Осы мақсатта Үкімет компанияларды ҚҚС төлеуші ретінде есепке қою бабалдырығын қолданыстағы 20 000 АЕК-тен (2025 жылы 78 640 000 теңгеден) 3 800 АЕК-ке (14 941 600 теңгеге) дейін кемітуге шешім қабылдапты.

(Жалғасы 4-бетте)



БОЗКІЛЕМДЕ АТОЙ САЛҒАН

БАЛУАНДАР

Күрестен биылғы маусым қазақстандық спортшылар үшін табысты басталды. Ірі халықаралық турнирлерде отандастарымыз біршама жетістіктерге қол жеткізді.

ӘЙЕЛДЕР ҚҰРАМАСЫ ТОП ЖАРДЫ

2025 жылғы маусым күрес шеберлері үшін бірнеше халықаралық турнирден басталды. Соның ішінде Қазақстан әйелдер құрамасы топ жарған болатын. Қазақстандық еркін күрес шеберлері Эльмира Сыздыкова мен Гүлдана Бекеш маусымды қос бірдей алтын жүздемен бастады.

Отандастарымыздың алғашқы жарысы – Францияның Ницца қаласында өткен Анри Деглан Гран-

при кезеңі. Аталмыш жарыста Эльмира Сыздыкова 76 келіге дейінгі салмақта өнер көрсетіп алтын медаль жеңіп алса, Гүлдана Бекеш 59 келіге дейінгі салмақта жеңіс тұғырының биік сатысына шықты. Айта кетейік, Бекеш 2024 жылы жастар арасындағы Азия чемпионатында қола медаль еншілессе, Эльмира Сыздыкова ересектер арасындағы құрлық біріншілігінде үшінші орын алған еді. Бұл жолы да Рио Олимпиадасының жүлдегері өз шеберлігін дәлелдеп, қарсыластарын айқын басымдықпен жеңді.

→ 8

ЖАСАНДЫ ИНТЕЛЛЕКТ ЖАППАЙ ҚҰБЫЛЫСҚА АЙНАЛМАЙДЫ

Осыдан бірер жыл бұрын өндірісті автоматтандыру қол жұмысын қажет ететін қызметті алмастырады деген қауіп басым еді. Ал қазір сарапшылар жасанды интеллекттің дамуы, машиналық оқытудың өркендеуі еңбек нарығынан интеллектуалдық рутиналық жұмыстармен айналысатын мамандарды ығыстыруы мүмкін деп дабыл қағуда. Жасанды интеллекттің дамуы еңбек нарығына түбегейлі өзгерістер әкелетіні анық. Қазақстан да дүниежүзінде жүріп жатқан бұл үрдістен қалыс қалған жоқ.

Жасанды интеллекттің еңбек нарығына ықпалы сөзсіз және оны екіжақты қарастыруға болады. Бір жағынан, ол кейбір жұмыс орындарын алмастыруы мүмкін, әсіресе стандартты, қайталанатын міндеттерді орындайтын қызметкерлер үшін. Бұл операторлар, курьерлер сияқты мамандықтарға қауіп төндірді. Екінші жағынан, жаңа технологиялар жаңа жұмыс орындарын тудырады, әсіресе IT, инженерия, креативті индустриялар және ғылыми зерттеулер салаларында.

(Жалғасы 4-бетте)



4 НАУРЫЗ 2025 | СЕЙСЕНБІ



ОТЫРЫСТЫҢ КҮН ТӘРТІБІН БЕКІТТИ

Сенат Спикері Мәулен Әшімбаевтың төрағалығымен бюро отырысы өтті. Онда депутаттар 6 наурыз күні өтетін палата отырысының күн тәртібін бекітті.

Іс-шара барысында бюро мүшелері палатаның алдағы отырысында «Қазақстан Республикасы мен Қатар Мемлекеті арасындағы қылмыстық істер бойынша өзара құқықтық көмек туралы келісімді ратификациялау туралы» заңды қарау туралы шешім қабылдады. Келісім айыпталушының кінәсін дәлелдеуге бағытталған процессуалдық әрекеттер жүргізуді көздейді. Заңның мақсаты – қылмыстық құқықбұзушылық жасаған

адамдарды экстрадициялауға құқықтық негіз қалыптастыру, сондай-ақ қылмысқа қарсы күресте халықаралық ынтымақтастықты нығайту.

Сондай-ақ сенаторлар «Қазақстан Республикасы мен Қатар Мемлекеті арасындағы ұстап беру туралы келісімді ратификациялау туралы» заңды қарайды. Бұл құжат қылмыс жазаған адамдарды беру тетіктерін қалыптастыруға, қылмысқа қарсы күресте халықаралық

ынтымақтастықты күшейтуге бағытталған. Келісім нормалары экстрадициялау және одан бас тарту негіздерін, беру шарттары мен рәсімдерін және экстрадициялауды кейінге қалдыру немесе белгілі бір мерзімге беру мәселелерін де айқындайды.

Сонымен қатар бюро отырысында депутаттар комитеттердің алдағы отырыстарында қаралатын мәселелерді пысықтап, Мәжілістен келіп тұрған заңдарды бөлі.

БҰЛ ЗАҢНАМА БҰРЫНҒЫДАН ӨЗГЕРЕК

Мәжілісте Экономикалық реформа және өңірлік даму комитетінің төрағасы Нұртай Сабильяновтың жетекшілігімен «Жасанды интеллект туралы» заң жобасы мен оған ілеспе түзетулердің таныстырылымы өтті. Заң жобаларының нормаларымен оның авторларының бірі, депутат Екатерина Смышляева таныстырды.



Екатерина Смышляеваның айтуынша, еліміз Еуропалық Одақтан кейін жасанды интеллект мәселелерін реттейтін жеке заң қабылдаған әлемдегі алғашқы елдердің бірі болуы мүмкін. Оны дамытудың негізі жасанды интеллектті экономика мен өмірдің түрлі саласына ауыртпалықсыз енгізу, оның жүйелерін сенімді әрі қауіпсіз пайдалануды қамтамасыз ету, елде тиісті технологияларды дамыту болды.

– Цифрлық заңнамада біз технологиялық бейтараптық қағидатын ұстануға тырысамыз, яғни заңдарды немесе ережелерді жеке технологияларға ғана бағыттамауымыз қажет. Бірақ бұл жағдайда технологияның ерекшелігі сонша, ол өз айналасында әлеуметтік қатынастардың ерекше түрін жасайды. Бұл заң жобасы оларды реттейді, – деді Екатерина Смышляева.

Оның айтуынша, негізгі заң жобасы 7 тарау, 27 баптан тұрады. Негізгі жаңалықтардың бірі – ЖИ жүйелерін тәуекел деңгейлері (ен төменгі, орташа және жоғары) бойынша жіктеу. Бұл пайдаланушылардың және қоғам мен мемлекеттің қауіпсіздігіне ықтимал әсеріне байланысты олардың жұмысын реттеуге мүмкіндік береді.

Бұл ретте бақылаусыз зардаптардың ықтималдығын азайту үшін жобадан Қазақстан аумағында адамның араласу мүмкіндігінсіз шешім қабылдайтын жүйелерді құруға және енгізуге тыйым салынады. Жасанды интеллект иелері мен әзірлеушілері пайдаланушыларға жасанды интеллектпен қалай әрекет ету қажеттігін ескертуге және оның қалай жұмыс істейтіні туралы түсініктеме беруге міндетті.

Жеке деректерді қорғау және айла-шарғы жасаудың алдын алу мақсатымен адамдарды әлеу-

меттік, биометриялық және мінез-құлық ерекшеліктеріне қарай бағалау үшін ЖИ-ді қолдануға қатаң шектеу, сондай-ақ адамның мінез-құлқын басқаруға қабілетті ЖИ құруға, пайдалануға тыйым салу туралы норма енгізіледі.

Сонымен қатар Ұлттық жасанды интеллект платформасы құрылады. Басқарылатын ортада ЖИ жүйелерін әзірлеу, оқыту және сынақтан өткізу үшін мемлекеттік технологиялық инфрақұрылым қалыптасуда. Бұл осы саладағы отандық шешімдерді дамытуға ықпал етеді. Бұл ретте ЖИ және деректер саласындағы мемлекеттік саясаттың негізгі бағыттары Үкіметте қалады. Реттеуші Цифрлық даму, инновациялар және аэроғарыш өнеркәсібі министрлігі жанынан құрылған Жасанды интеллект комитеті болады.

Ілеспе жоба аясында Әкімшілік құқықбұзушылық туралы кодекске, сондай-ақ «Ақпараттандыру туралы», «Дербес деректер және оларды қорғау туралы», «Тұтынушылардың құқықтарын қорғау туралы», «Масс-медиа туралы» заңдарға өзгерістер мен толықтырулар енгізіледі. Осылайша, ЖИ туралы заңнама талаптарын бұзғаны үшін, оның ішінде синтетикалық деректер туралы пайдаланушыларды хабардар етпегені және ЖИ жүйелерінің тәуекелдерін басқарудың болмауы үшін әкімшілік жауапкершілік белгіленеді. Сондай-ақ электронды үкімет аясында ЖИ жүйелерін дамытуға талаптар қарастырылады. Жеке деректерді ашық көздерден алуға шектеулер, медиаконтент жасау кезінде ЖИ-ді қолдану туралы пайдаланушыларды хабардар ету міндеті белгіленеді.

АЗЫҚ-ТҮЛІК БАҒАСЫ РЕТТЕЛМЕК

Премьер-Министр орынбасары – Ұлттық экономика министрі Серік Жұманғарин жұмыс кеңесін өткізіп, әлеуметтік маңызы бар азық-түлік тауарлары бағасының қазіргі жағдайын талқылады.

Сауда және интеграция министрлігінің мәліметтері бойынша, осы жылдың ақпан айында ЭМАТ бағасының өсу индексі 1,3%-ға дейін баяулаған. Сонымен қатар бес тауар түрі: күріш (-2,9%), жұмыртқа (-1,4%), ұн (-0,8%), макарон өнімі (-0,4%) және қарақұмық (-0,2%) бойынша баға төмендеді. Жыл басынан бері көкөніске бағаның маусымдық өсуі байқалауда.

Өнімдерде қордағы өнімдерді сату жұмысы жүріп жатыр. Ауыл шаруашылығы вице-министрі Ербол Тасжүреков 156,9 мың тонна жалпы көкөніс қорының 53,9 мың тоннасы сатылғанын, қазіргі сәтте 92,5 мың тонна көкөніс қоры қалғанын хабарлады.

«Жүргізілген түгендеулерден кейін қоймалардағы картоп қоры 47,6 мың тоннаны, сәбіз – 16 мың тоннаны, пияз – 14,6 мың тоннаны, қырық-

қабат – 14,1 мың тоннаны құрап отыр», – деп мәлімдеді Ербол Тасжүреков.

Ауыл шаруашылығы вице-министрінің айтуынша, бұл қорларды сату жұмыстары жалғасуда.

Вице-премьер нарыққа өнімдерді аз жеткізген, әлеуметтік маңызы бар азық-түлік бағасын тиімсіз реттейтін өнімдердің жұмысын сынға алды. Атап айтқанда, елорданың ірі сауда желілерінің бірінде ақпан айында картоп жеткізу кешіктірілгені байқалды, осыған байланысты Сауда комитеті мен «КТЖ Экспресс» АҚ көмегімен аталған көкөністі желел жеткізу жұмысы ұйымдастырылды. Серік Жұманғарин басқа өнімдерде мұндай жағдайлардың алдын алу үшін картоп және әлеуметтік маңызы бар өзге де тауарлар қорына тексеріс жүргізуді тапсырды.

Тұрақтандыру қорларындағы өнімді сату, маусымаралық кезеңнің басталуына байланысты жекелеген аймақтарда импортталған картопты жеткізу басталды. Сонымен қатар аумақтық Сауда департаменттері ЭМАТ-қа сауда үстемесін бақылау бойынша жүйелі жұмыс жүргізіп келеді. Жыл басынан бері және 27 ақпандағы жағдай бойынша 842 сауда нысаны сауда үстемесін асырғаны үшін әкімшілік жауапкершілікке тартылды.

ҚОС АЗАМАТТЫҒЫ БАР АДАМДАР АНЫҚТАЛДЫ

Былтыр елімізде қос азаматтығы бар 700-ге жуық адам анықталды. Бұл туралы Ішкі істер министрлігі хабарлады.

– 2025 жылдың қаңтар айында Қазақстан Республикасы азаматтығы туралы заңнаманы бұзғаны үшін әкімшілік жауапкершілікке Қазақстан Республикасының бұрынғы 66 азаматы тартылды. Басым көпшілігі Ресей Федерациясының (64) азаматтығын қабылдағандар. Сондай-ақ Германия (1) және Қырғызстан (1) азаматтығын алған екі тұлға бар. Оның 35-і айыппұл төлесе, 31 адам елден шығарылды, – делінген хабарламада.

Сондай-ақ ведомство былтыр қос азаматтығы бар 700-ге жуық адам анықталғанын мәлімдеді.

– 2024 жылы Қазақстан Республикасы азаматтығы туралы заңнаманы бұзғаны үшін әкімшілік жауапкершілікке Қазақстан Республикасының бұрынғы 675 азаматы тартылды. Басым көпшілігі Ресей Федерациясының (565), Түркия (26), Германия (11) және АҚШ (22) азаматтығын қабыл-

дағандар. Оның 526-сы айыппұл төлесе, 149 адам елден тыс шығарылды, – деп хабарлады Ішкі істер министрлігі.

Былтыр Қазақстан азаматтығын алушылар саны 25 пайыз азайғаны белгілі болды.

– 2025 жылдың қаңтар айында 1 513 адам Қазақстан азаматтығынан бас тартты, оның басым көпшілігі Ресей Федерациясы (1 165), АҚШ (51), Түркия (41), Канада (27) және Ұлыбритания (26) елдеріне қоныс аударған, – деп мәлімдеді ведомстводан.

Сондай-ақ Ішкі істер министрлігі былтыр ел азаматтығынан бас тартқан адамдардың 85 пайызы Ресейге көшкенін мәлімдеді.

– 2024 жылы 19 888 адам Қазақстан азаматтығынан бас тартты, оның басым көпшілігі Ресей Федерациясы (16 941), Түркия (725), АҚШ (462), Канада (260) және Ұлыбритания (168) елдеріне қоныс аударған, – деп жазылған хабарламада.

Одан бөлек, 2024 жылы 1 адам Қазақстан Республикасы азаматтығынан шығарылған. Заңнамаға сәйкес, Қазақстан Республикасының азаматтығы екі жағдайда тоқтатылады: өз еркімен шыққанда және азаматтықтан айырғанда.



